

記載第一 中國大事記

宣統二年四月中國大事記

問 天

初一日 諭以魁斌等爲資政院欽選議員以八月二十日爲召集之期并 諭令各議員

無庸謝恩

各議員姓名詳見諭旨。

同日 浙江德清縣新市鎮警局被衆搗毀

德清新市鎮警局巡官吳某。秉性剛愎。遇事偏執。輿情素不和洽。加以經費支絀。又藉官紳壓力。勒派警捐。因此民怨沸騰。適是日有孩童三四人。在市場上賭錢。被巡士將稍長之二人拘至局中。其父兄聞信趕至。求將二童釋放。以便帶回管束。吳巡官不允。必欲照章罰辦。衆情不服。咸與吳巡官爲難。吳巡官抽出佩刀。向衆示威。遂致戮傷多人。民情愈憤。匪徒乘機瀾入。遂將警局搗毀。吳巡官亦被毆傷。又波及明溪小學堂。書籍器具。全被焚毀。各店均一律罷市。事後。商會公議。先由紳商會銜電稟省臺。請將巡官撤換。又謂地方設立警察。原以保衛治安。今反殃民。不如一律停捐。仍照舊章。自辦團練。以資保衛。各店均於初五日照常開市。聽候查辦。

初七日 頒行現行律令內外問刑各衙門依法聽斷

現行律及憲政編查館奏摺。均見宣統新法令第十九册。

同日 奉 諭以山西文水交城兩縣禁種鴉片慘殺鄉民將山西巡撫丁寶銓交部察

記載第一 中國大事記

六十五

庚戌

議在事文武各官分別革職撤差

山西文水縣因抗拒禁煙之令。省臺派兵前往。殺傷多人。事後。經御史胡思敬專摺劾奏。奉旨令直隸總督陳夔龍查辦。旋由陳總督查明覆奏。略言此案始由武樹福弓九湖二人。藉要求種煙爲名。廣布傳單。斂錢聚衆。甚至訂立合同。稿據爲之迫脅入約者。竟有二十一社之多。似此頑梗之尤。委屬法無可貸。惟當其立約之始。該地方官果早爲覺察。勸導有方。當不難立時解散。卽武樹福等怙終不悟。亦祇需拿辦一二人。其事自平。乃已革文水縣知縣劉彤光。事前既已疏忽。臨時又甚張皇。倉卒請兵。致釀重案。僅予革職。尙覺稍輕。抑犯事雖在文水。而起釁實由交城。署交城縣知縣徐星朗。於本邑種煙。查禁敷衍。復坐任部民勾結鄰境。聚衆滋事。毫無阻遏之方。平心而論。豈能無咎。至派兵之初。丁寶銓三令五申。專備彈壓。乃夏學津鹵莽圖功。輕於一發。且於武樹福已獲之後。大索不休。誤傷多命。嗣復多方諉卸。以掩其過。無怪爲衆怨所歸。李逢春身爲管帶。竟惟夏學津之命是聽。又縱令所部兵隊騷擾閭閻。則平日之毫無紀律。於此可見。以上各員。均屬咎無可辭。至山西撫臣丁寶銓。嚴禁種煙。分所當爲。迨事起之後。疊據地方官紳電稟交馳。甫行派兵彈壓。且諄囑毋得輕發。未嘗不慎重出之。其飭將武樹福就地正法。亦屬誅當其罪。是該撫臣之於此案。措置尙無不合。惟核其兩次陳奏。但就各文武等所稟情形。據以入告。未能詳細確查。且僅將劉彤光參革。而於此外辦理不善之文武。概未議及。似亦不無疏忽。云云。當奉旨。丁寶銓交部察議。文水縣知縣劉彤光革職。永不敘用。署交城縣知縣徐星朗革職。陸軍教練處幫辦夏學津。陸軍步隊第一營管帶李逢春。均撤差褫革。

按山西教育會曾繕發公函。宣布此案始末。略言晉省交文兩縣一帶。爲產煙最著之區。去年實行禁種。一律禁絕。

本年正月。卽有匪徒武樹福弓九湖等。藉抗禁種煙。勾結一般游民。創立種煙合約。迫脅村衆入約。良民稍知畏法者。多不肯從。或用火燒屋。或勒索巨資。由是被脅入約者二三十村。二月初一日。因縣官聞知。恐派差拿。遂於文水縣之開柵鎮。鳴鐘聚衆。約萬餘人。愈聚愈多。不可勸導。縣官請兵彈壓不服。相持十餘日。彼見官兵不動。氣餒益張。村紳告急之書。一日數至。凡在籍紳士。亦言非捕拿首要。不能解散脅從。十三日黎明。縣官帶眼線四人。會同員紳。酌調兵隊。前往開柵。比時卽將匪首武樹福拿獲。卽有百數十人出而抗捕。一一就擒。該村社首久被匪脅。不敢與官紳相接。至是始各具衣冠入廟。縣官見事已立解。將擒獲拒捕從犯。分別令社首等當場保釋。不欲株連也。不料正辦理間。鄰村匪黨率衆數千人。各持鎗械。齊來猛撲。兵隊人少勢單。不可抵禦。危急萬分。先放空鎗還擊。匪大笑益進。遂至決裂。三路當場格斃者約十數人。匪各竄去。事遂大定。各村花戶。一二日間。均赴縣具結完案。脅從者概免深究。兵隊是日已撤回交城。居民無擾。本省士紳同觀情形。毫無異議。並僉謂此事若非及早了結。必釀大亂。云云。

山西諮議局議長梁善濟先時報告。對於官場。亦頗有原恕之詞。以是大爲晉陽公報所攻訐。指爲媚官殃民。梁因偕全體議員自行辭職。并作書通告各省諮議局。其後舉人蔣景汾被拘至縣禁押。聞以其爲報館訪員之故。學界中人定期開同志會。研究此案。亦經官勒令改期。并不許學生到會。

初十日 諭飭各省督撫考核巡警勸業道

時湖北巡警道馮啓鈞。經湖廣總督瑞澂劾其溺職殃民。經降旨卽行革職。永不敘用。時又有以各省巡警勸業兩道多不稱職爲言者。故復諭飭各省督撫悉心考核。如不能勝任。或於此缺不宜。卽行奏明開缺另補。

十一日 諭飭督辦鹽政大臣及會辦各督撫所有鹽務用人行政一切事宜仍照奏定章程辦理

三月初四日。諭飭各省督撫與督辦鹽政大臣和衷辦理後。各督撫復聯銜電爭。略言竊錫良等電奏督辦鹽政大臣原奏章程用人行政諸多窒礙一摺。欽奉電旨。著督辦鹽政大臣會商各該督撫。詳議具奏等因。仰見朝廷慎重錢綱之至意。莫名欽佩。嗣准督辦大臣電告覆奏大意。並稱往復互商。徒稽時日。卽由該大臣專摺具奏等因。隨卽奏奉 諭旨允准。並准電咨在案。錫良等詎宜再參末議。惟是立法必熟權利弊。而後可利推行。若心知其害。而隱忍不言。實非內外相維之道。此次督辦大臣覆奏各節。惟委署差缺及年終密考兩事。稍與變通。而於用人行政窒礙之處。未盡詳究。錫良等往復電商。有前奏所未詳。不敢不直陳於 君父之前者。該大臣原奏有云。必內外有一定之權限。而任職者各專責成。其言至爲扼要。查原章疏銷緝私。責之督撫。鹽務內用人行政一切事宜。則均由督辦主持。夫曰疏銷。曰緝私。皆關鹽務行政。而疏銷緝私之能否得力。則視乎用人。今有疏銷緝私之責。而無用人行政之權。是猶束縛手足而使之運動也。事理既屬相背。政體亦覺非宜。又原章運司鹽道。及經管鹽務各總局所管各項事宜。均詳請督辦大臣覆辦。仍詳明督撫查核。夫督撫既有查核之責。於詳報事件。是否可行。自應酌核批示。分別准駁。設督撫曰可。而督辦大臣曰否。督撫曰否。而督辦大臣曰可。僚屬將何所適從。如准駁悉由督辦主持。督撫無庸批示。何必多此詳報之具文。鹽務鉅細事件。至爲紛繁。如修灘築坵。開井增竈。建倉添卡。以及鹽引之借銷配運。及非竈灘戶之酌借成本諸事。不勝枚舉。向由該管鹽員隨時稟准督撫辦理。一面奏咨立案。今若改由督辦主持。邊遠省分。文牘往返。經年累月。始得奉批。萬一貽誤鹽運。或致釀事端。誰執其咎。至委署委差人員。向

由督撫批准札委。赴任到差。今新章須由該管官遴派。詳候督辦大臣核准。如未奉准以前。例不准到差到任。各省鹽員遇有事故。或改委撤調。事所恆有。豈能懸缺待人。若事事電稟督辦大臣。恐亦不勝煩費。又如未設鹽務專官。省分大小鹽局。向係任用候補道府以下人員。遇有重要局所。臨時斟酌。每苦乏人。其辦事得力者。大率委有他項差缺。自應由督撫分別緩急。酌量調用。似難聽憑該管官遴派。率予核准。又原章凡關係鹽務事件。均由督辦大臣主稿會奏。似督撫不得單銜奏事。查督撫有管理糧餉之責。既使與聞鹽政。自宜陳述所見。上達 聖聰。國朝定制。監司大員。例得專摺言事。豈反靳督撫以奏事之權。如謂督辦會辦事。無專斷。必須公商定稿。再行會奏。則原章內重要事件。由督辦大臣單銜具奏一節。亦似未協。總之該大臣原奏章程。係為統一事權起見。實則各省鹽務悉隸於度支部。統攬全局。總握大綱。事權未嘗不一。但使部臣考核精審。規畫周詳。各省無不遵辦。斷無彼疆此界之虞。若僅集權中央。而不揆諸吾國歷史。及地方各種之關繫。以求適用。恐新章頒布後。督撫之命令。既有所不行。督辦之考察。又有所不及。機關窒滯。庶務因循。將成一痿痺不仁。散渙無紀之鹽政。理辭益紛。其患害有不勝言者。督辦大臣載澤。公忠亮直。果知茲事體大。利害攸關。必無一毫成見。相應再懇 天恩。敕下會議政務處。詳察核議。或飭督辦大臣與臣等會商議奏。妥慎施行。再現今國稅地方稅。尚未劃分。新政繁興。攤款迭出。邊苦省分。於清理財政辦法。一時實難辦到。鹽課為大宗入款。如不准隨時通挪。勢必無從周轉。貽誤要需。應請暫准通融辦理。合併聲明。謹請代表。云云。

各督撫復又致電鹽政處。力陳奏定章程之不便。略言查原章窒礙之處。前次電奏已大概言之。今鈞電既籌及督辦與督撫各分權限。而下又云鹽政處仍不失直接行政機關。是仍無所謂限無所謂分也。竊謂中央如頭目。各省

督撫如手足。頭目主發蹤指示。手足主捍衛。二者各有所司。交資爲用。若謂頭目能徑代手足之勞。妄奉其捍衛之具。而仍日日責手足以捍衛。此必無之事也。今原章內第二章。一則曰督辦大臣管轄全國鹽務官吏。總理全國鹽務事宜。一則曰凡鹽務用人行政事宜。均由督辦主持。是鹽務內事固已專屬於督辦一人矣。乃復以督撫兼會辦。使分管所屬鹽務事宜。既稱會辦。事必會商。稿必會合。既定分管。事權宜一。責任宜專。今則會辦不必主稿。督辦可以單銜。是僅有會辦之名。恐並無會商之實也。疏銷緝私與用人行政。不能劃分二事。此理之易明者。若僅以疏銷緝私責督撫。不過紙上空談。即謂緊急不勞會商之事。可由督撫相機辦理。然平時既未能主持。臨事將何從核辦。如但以管轄緝私各營爲督撫權限。則一武弁優爲之。將何待督撫乎。夫以中國幅員之大。官員之衆。事亦滋繁。而謂督撫一人心思才力。竟能考察無遺。並能辦事者遲速無誤。此事之未敢必者也。尊旨縱爲中央集權起見。不知督撫之權。皆係中央之權。未有可專制自爲者。若至督撫無權。恐中央亦將無所措手。時方多故。獨奈何去其手足而自危頭目乎。此可爲深慮者也。茲荷垂詢。遵經詳細會商。酌擬辦法。以備採擇。一曰用人權限。派署運司鹽道。及派充鹽局總辦。由督撫預保。或臨時遴員。咨請督辦會奏派任。自當遵照辦理。惟鹽局總辦有向不奏派者。似可由督撫按格遴員。一面咨明督辦。其餘大小鹽員。京外遙隔。督辦未能周知。除補缺應仍按班次外。一切委署委差。擬請概由督撫主持。仍由該管官詳報督辦備案。蓋督撫耳目切近。屬僚賢否。考察較真。卽有不肖鹽員。亦不敢肆無忌憚。實爲整飭離綱之本原。惟是督撫既於用人負其責任。則凡鹽官之甄別舉劾。大計密考。似應仍由督撫核辦。倘慮舉劾不當。則濫保誤揭。自有定例。督辦有糾察之責。儘委調時考核。奏明辦理。至水陸緝私各營。既歸督撫管轄。所有黜陟徵調。應亦由督撫主持。隨時咨明。一曰行政權限。督辦總理全國鹽務。但當規畫大端。如有大興

革及特別重要暨關係數省或全局者。該管官得條具辦法。分稟督辦核示。督辦亦得隨時直接查詢。會商督撫辦理。其餘事件。仍照前由督撫主持。既免彼准此駁之嫌。而公事亦無停滯耽延之弊。所有產銷情形課釐收數暨報銷交代冊結。惟由該管官按月或隨時詳報督辦查核。一曰奏事權限。督撫例得奏事。尋常例摺。無妨由督撫主稿。今重要事件。既得由督辦單銜具奏。請旨。似督撫專奏。亦無逾分之嫌。況事有急迫待辦。不及會商。或非電商所能詳盡者。實難遇事拘泥。即會奏之件。有先未公商定稿。督撫確知為難行者。亦應陳述所見。上達宸聰。方不失內外相維之意。一曰用款權限。各國財政。中央既握其事權。即應兩擔其責任。今則各省積虧不為不多。各督撫擔負不為不重。攤款既隨事增加。撥款又非盡有著。新政經費。復日多一日。本量入為出之古說。削足適履。勢實有所不行。凡遇本省緊要急需。及奏咨有案之濟協各款。雖未指定鹽款。而急須撥解者。應請准於鹽款內酌量挪撥。一面奏咨。以免貽誤。又一省之大。鉅細用款。幾乎無日不有。若逐款須咨明立案。實亦不勝其煩。查前年度支部奏明外銷各項。果係實在應用。即予劃留。際此各省款絀用繁。凡有現已報部。而從前本係外銷之款。應請儘數截留撥用。仍彙造清冊咨請核銷。如督辦動撥各省鹽款。亦請知照各省。以上各節。倘蒙採納。則凡與原章鑿柄之處。應請一併刪改。良等非敢堅持異議。實因鹽務為民食國課攸關。且於地方關係甚大。督撫既肩重任。未敢隱忍不言。至於各省鹽務糾紛。應如何調查地方習慣情形。參酌古今中外制度。規畫全局。變通盡利。此則私心竊禱於鈞處者也。云。

至是督辦鹽政大臣載澤具摺覆奏。欲將用人行政各事宜。仍歸諸督撫。故特傳旨申斥。令仍照奏定章程辦理。

同日 諭飭兩江總督嚴防匪亂

記載第一 中國大事記

七十二

五月

是日軍機處致兩江總督張人駿電云。奉旨現在長江一帶。春雨過多。米價騰貴。又值江甯省城開辦勸業會。中外商民陸續麇集。迭據英德美等國使臣。向外務部聲稱。該處長沙亂事後。人心浮動。匪黨潛滋。近復有剪髮辮。割雞尾。小孩身佩符籙。學生懷挾槍彈等事。外人性命財產。在在堪虞。各擬商派兵輪前往觀會。藉可隱為保護等語。沿江地方不靖。訛言繁興。各國咸有戒心。伏莽時虞蠢動。亟應切實防範。預遏亂萌。該督前調兩營彈壓會場。如果不敷分布。仍著酌添水陸數營。隨時嚴密梭巡。加意偵緝。如有不法匪徒。勾結煽惑。以致施行邪術。擾害閭閻。亦當協力查拿。一經訊實。卽行就地正法。勿稍輕縱。以弭事變。而保治安。並將辦理情形詳斷電奏。是為至要。欽此。

十二日。張總督覆電云。長江一帶。素多伏莽。況值湘省亂後。人心疑懼。謠諑紛騰。又加以調查戶口。屢屢滋事。飢民時復羣聚。適值勸業會開幕。四方萬國。鼓舞紛來。衝勢礙難中止。似此麇集多人。難保秀民不從中生事。防範自應加嚴。入春以來。經通籌預備。已調江防馬步隊七營。分佈會場附近。現復調淞滬巡防兩營。扼要屯紮。作為游擊。下關為交通要地。水陸交衝。已派督署警衛隊及江甯巡防營與長江礮船水師巡警。到處巡邏。聯絡防緝。此事前佈置之情形。容隨時察看。倘兵力尙屬不敷。當酌量添募至剪髮辮。割雞尾。小孩身佩符籙。學生懷挾槍彈等事。實係巫覡造誑詐。學堂兵操。執用無彈廢槍。傳聞誤會。前據駐甯四國領事照會。並准外務部電咨。業已力破疑團。擔任保護。茲經購運米麥雜糧。振耀並施。以安輯飢黎。一面分飭自治教育各會。並該地方官。將調查戶口事宜。明白開導解釋。毋令無稽調言。轉相淆惑。總之會事之興。適在地方多事之秋。奸人易於煽惑。匪類從而生心。刻下省垣布置略定。惟大江上下。頻年不靖。頗慮防不勝防。亟宜派兵輪以資鎮懾。查海琛鏡清飛鷹三艦。雷艇兩號。前因湘事。已派在江防游弋。應請飭下海軍處。於海圻海容二艦中。再撥一號及次號兵艦二三艘來甯。與前派各艦艇。統

歸人駿暫行調遣云云。

十四日軍機處又致張總督電云。奉 旨張人駿電奏悉。據稱會場附近。以及下關要地。業派巡防衛隊暨礮船巡警屯紮巡邏。布置尙屬周妥。巫覡書符造誑。雖由積習相沿。而翦髮等事。並非常有。顯係邪匪所爲。稍涉縱容。卽虞滋蔓。應飭地方文武留心訪察。如有此等匪徒。卽行拿獲嚴辦。懲一儆百。此風庶可斂息。調查戶口。迭次生事。固由鄉愚無知。受人搖惑。亦難保無劣董奸胥藉端需索情事。仍著嚴飭各官紳。於認真曉示開導外。務當妥爲辦理。勿任稍有紛擾。以免誤會而靖人心。所請添派兵輪。卽著海軍處再行酌撥。統歸該督暫行調遣。欽此。

同日 江蘇拼茶場竈民滋事拆毀如皋學堂

江蘇東臺縣拼茶場竈民。因往如皋縣李堡鎮購買平糶米。忽滋生事端。將廣益學堂搗毀。並毀董事五家。糶米分處兩所。

同時泰興縣季家市。亦有饑民數千人。將鎮中米鋪一律搗毀。

是月松江府屬奉賢縣之板戶。(沿海煎鹽者名曰板戶)亦因饑滋事。

同日 安徽南陵縣鄉民滋事毆傷調查員

南陵縣月初調查戶口。北鄉忽來一遊方醫生王某。口稱伊從江蘇泰興一帶而來。目見該處調查戶口人名冊。一經報送到官。其家卽全家死亡。蓋此調查冊係修造鐵路所用。或填枕木。或頂橋梁。爾等速將冊取回云云。一時愚民輕信其言。咸至調查員處索回草冊。經調查員報縣往拿未獲。十一日。下東鄉宣南接壤之西河鎮。有數百人。轟至調查員某君家。索取草冊。并將其家圍住。聲稱如不將冊交出。定行縱火焚屋。某君專人報縣。適知縣程蔭堂奉

委赴宣城。遂便道往該鎮解散。聞當場拿獲爲首兩人。交地保看管。雖經官府出示曉諭。調查員百端解說。終無效力。十二日夜。上東鄉浦橋地方。又有客民雷某嘯聚愚民數百人。將調查員李開基研究所教員潘崇基家。肆行拆毀。李母年已八旬。聞警奔避。幾乎淹死塘內。該客民自恃人衆。復闖至地保某甲家。搗毀一空。是夜。西鄉工山坊某調查員家。亦被鄉民圍住。幸將草冊立刻交出。始免擾害。十四晚。東鄉清弋江鎮。又有愚民千餘人。一面將警局圍住。一面往各調查員家勒令退冊。一時人聲鼎沸。礮石如雨。警員臧某乘機逸出。未遭危險。而局中器具。業已打毀一空。又是晚浦橋地方愚民餘怒未息。復將教員秦良楷葉維楨葉書有三家拆毀。片瓦無存。又刀傷葉君左臂。自治公所時以知縣出境未回。特函請巡官陳某典史陰某。分途往東北兩鄉彈壓解散。城內居民亦被動搖。遂將調查戶口事暫行停止。

十六日 降 諭宣示國幣制度

前一日。度支部奏進釐定幣制酌擬則例事單一件。又奏陳籌擬舊鑄銀銅各幣辦法一摺。奉 旨留中。(以上二摺均見宣統新法令第十九冊)是日即降 諭將中國國幣制度明白宣示。(詳見 諭旨)是爲中國改革幣制之一大關鍵。閱者宜留意焉。

度支部旋於二十三日奏請將官俸章程按照國幣則例釐定。計數名稱。請 旨頒布。(原摺見宣統新法令第十九冊)二十五日。復進呈新鑄各種銀幣。

十八日 以汪大燮充出使日本國大臣

時出使日本國大臣胡惟德補授外務部右侍郎。故以汪大燮繼其任。

十九日 奉 諭以前月湖南省城肇亂文武各官辦理不善分別革職議處有差釀亂之

紳士亦分別革職議處

湖南省城前月肇亂。至是湖廣總督瑞澂湖南巡撫楊文鼎查明具奏。(奏摺見文件門)因降 旨除開缺巡撫岑春煊已交部議處外。巡警道賴承裕鹽法道朱延熙等均革職。布政使莊賡良開缺交部議處。按察使周儒臣長沙府知府汪鳳瀛交部察議。長沙縣知縣余屏垣善化縣知縣郭中廣均革職留任。旋部議岑春煊莊賡良均應革職。奉 旨依議。周儒臣汪鳳瀛應降三級調用。改爲降三級留任。

瑞總督及楊巡撫既陳明湖南文武各官罪狀。瑞總督復單銜劾奏湖南紳士挾私釀亂。(原摺亦見文件門)故同日降 諭將前國子監祭酒王先謙分省補用道孔憲教交部嚴加議處。吏部主事葉德輝候選道楊鞏均革職。交地方官嚴加管束。旋部議王先謙孔憲教均應降五級調用。奉 旨依議。

自奉 諭後。湖南諮議局議長譚延闓副議長胡璧等致電軍機處。爲諸紳士辯誣。略言湘亂由官釀成。久在洞鑿。事前湘紳屢請阻禁備賑。有案可查。岑撫始則偏執成見。玩忽遷延。臨事畏葸無能。但思卸責。巡撫爲一省政權所出。貽誤至此。答何可辭。鄂督分罪士紳。爲岑撫曲脫。殊失情理之平。業經奉 旨。本不應冒昧瀆陳。惟諮議局爲代表與論機關。事實昭然。不敢緘默。應如何請 旨覆查。以服人心而昭公道之處。伏乞鈞裁。云云。旋於二十六日。奉 上諭湖南諮議局議長譚延闓等電請軍機處代奏。稱鄂督分罪士紳。爲岑撫曲脫。請旨覆查等語。諮議局議事權限。載在章程。不容踰越。乃於朝廷處分官紳。督臣查辦奏案。亦欲藉端干預。希圖翻異。措詞謬妄。殊屬不安本分。著傳旨嚴行申飭。並著該署撫隨時查察。該局議長譚延闓等。如借諮議局之名。於不應與聞之地方公事。藉詞抗

阻。即著從嚴參撤。欽此。

同日 諭飭京外各官將籌備憲政某年某事需款若干從實籌定分年列表詳議具奏。去年御史趙炳麟會上請確定行政經費一摺。請飭下各官將九年籌備單內所開各條。某年某事需款若干。從何處籌定。在何項指撥。分年列表。詳議具奏。俟資政院開會。即將此交該院議員核議。視民力能否擔任。分別輕重緩急。次第施行。疏入留中。至是復以爲言。故特下此諭。(趙御史兩摺均見文件門)

二十日 外務部尚書梁敦彥因病給假以鄒嘉來署外務部尚書兼會辦大臣

同日 憲政編查館奏請派員分赴各省考查籌備憲政情形奉 旨依議

原摺略言。查各省籌辦憲政成績。第一年下屆及第二年上屆。業經臣館考核具奏。其第二年下屆。現亦各據陸續奏報前來。一俟到齊。即當照章考核。分別殿最。彙案具奏。惟專就奏章考核。則各省所陳。固無不井井有條。言之成理。究竟實際何如。殊難遙度。其中成效昭著。語無虛飾者。固應多有。而因循敷衍。徒託空言者。恐亦在所不免。非遵照奏案。派員親往各省考查。不足以昭核實。但二十二省道路有遠近之殊。交通有便否之別。其道路較近。交通較便之處。一兩月即可竣事。若邊遠省分。鐵路輪船未通之區。往返即須數月。瞬息暑雨之期。行路既多艱阻。且值暑假期內。有關於學堂之事。亦即無從察視。臣等公同商酌。擬分兩期辦理。第一期分爲四路。直隸東三省爲一路。派臣館編制局科員候補四品京堂陸宗輿。山東山西河南爲一路。派臣館考核專科幫辦安徽道監察御史黃瑞麒。湖北江西安徽江蘇爲一路。派臣館編制局科員翰林院祕書郎劉福姚。浙江福建廣東爲一路。派臣館考核專科科員候補四品京堂林炳章。分途前往各該省切實考查。應請 旨飭下各該省督撫。轉飭所屬。於該員等到該

省考查時。如須前赴各衙門局所學堂稽察辦法。詢問情形。調閱案卷。務各妥爲接待。據實詳細檢示。不得敷衍迴護。俾得認真稽考。察知底蘊。俟該員等查竣回京。將所查情形詳細報告。由臣等核明具奏。其辦理核實。著有成效者。請旨褒獎。其逾限不辦。或陽奉陰違。或有名無實。與所奏不符者。請旨嚴加懲處。庶足以昭勸懲而重憲政。至陝西甘肅新疆四川廣西雲南貴州等省。道途較遠。湖南一省。亂事甫平。經該撫奏明籌辦憲政展緩三月。有案均請作爲第二期。於秋季再行派員前往考查。云云。

二十二日 奉 諭以正月廣東新軍滋事該管官措置失當飭將協統張哲培一標統帶劉雨沛拿解大理院治罪兩廣總督袁樹勛交部議處餘官分別革職議處

廣東新軍滋事案上聞後。給事中陳慶桂奏言。此案恐有冤濫情事。請派員查辦。當奉 諭飭兩江總督張人駿澈底查究。至是張總督據實奏陳。(原摺亦見文件門)故降 諭將匿避之張哲培劉雨沛拿解治罪。釀禍之老城巡警第一分局巡官陳慶讓即行革職。督練公所參議吳錫永統領水師親軍吳宗禹交部議處。兩廣總督袁樹勛亦交部議處。旋部議應革職留任。奉 旨依議。

二十八日 南洋勸業會閉會

南洋勸業會本定是月初一日開會。旋因布置未畢。故改於二十八日開會。是日午前八時開會。先由審查總長侍郎楊士琦恭釋 旨意。次由正會長兩江總督張人駿述開會詞。次由董事會嚴義彬報告本會經費及工程概略。次由坐辦陳琪報告籌備執行概略。次由各代表致頌詞祝詞。旋即散會。是日因布置尚不完全。故僅開教育工藝器械武備衛生農業等六館。及直隸陳列館。其餘各館。須俟至五月間方

能開齊。
是日第一號入場券。由南洋僑商梁炳農承買。出銀一萬元。

記載第一 中國大事記

七十八

五月

